

**Meeqqanut ileqqaarutit pillugit aqqissuussinerup atorunnaarnissaa pillugu
Inatsisartut inatsisissaattut siunnersuut.**

(Aningaasaqarnermut Naalakkersuisoq)

Saqqummiussissut

(Aningaasaqarnermut Naalakkersuisoq)

Siullermeerneqarnera

Naalakkersuisut sinnerlugit meeqqanut ileqqaarutit pillugit aqqissuussinerup atorunnaarsinneqarnissaa pillugu siunnersuut matumuuna saqqummiutissavara.

Siunnersuut Demokratit, Kattusseqatigiit aamma Inuit Ataqatigiit naalakkersuisooqatigiinnisamik isumaqatigiissutaannut malitseqartitsineruvoq. Naalakkersuisut meeqqanut ileqqaarutit pillugit aqqissuussinerup atorunnaarsinneqarnissaa kissaatigaat, taarsiullugulu taakku 18 mio. koruunit missigisaat ukiut tamaasa tamatumunnga immikkoortinneqartartut meeqqanut inuusuttunullu taperserneqarnissamik pisariaqartitsileriasaartunut suliniutinut atorniarlugit.

Meerartatta inuusuttortattalu naammaginaratumik ineriartornissaasa qulakkeerneqarnissaannik kalaallit inuiaqatigiit annertuunik unammilligassaqaqarneranni, Naalakkersuisut isumaqarput ukiumut 18 mio. koruunit, meeqqanut ileqqaarutinit, meeqqap 18-inik ukioqalernerani aatsaat tunniunneqartussanik, aqqissuussinerup atorunnaarsinnaat naleqqutinngitsoq. Aningaasat taakua meeqqanut inuusuttunullu ullumikkut ullormik ajunngitsumik atuinissamik ajornartorsiuteqartunut atorunnaarsinnaat Naalakkersuisut kissaatigaat.

Erseqqissaatigineqassaaq meeqqat tassalu pisassaartut, maannakkut aqqissuussinerup aningaasamik uninngatitaqartut uninngatitanik annaasaqassanngimmata.. Meeqqanut ileqqaarutinit pisassarisat aningaaserivimmi nalinginnaasumik kontomut meeqqap aqqanik nalunaarsugaasumut nuunneqassapput sukkuluunniillu atorunnaarsinnaasuussallutik.

Meeqqanut ileqqaarutinit aningaasaliissutit Akileraartarnermut Aqutsisoqarfimmit GrønlandsBANKEN suleqatigalugu ingerlanneqarsimapput. Aningaasallu pappiaqqanik aningaasamik nalilinnut aningaasaliissutaasimapput, maanna tunineqartussanik.

Meeqqat pisassaannik uninngasuutit nuunneqareerneranni, aningaasat 1. januar 2012-imi inaarutaasumik naatsorsorneqarpata, aningaasat sinneqassappata aningaasat sinneruttut nunatta karsianut nakkartinneqassapput. Akerlianilli ilimagisamit allaanerusumik amigartoorneqassappat nunatta karsia amigartoornermut matussutissiissaaq. Tamatumunnga oqaatigissavara maannamut aqqissuussineq annikitsumik sinneqartooruteqarmat.

Ilisimatitsissutiginnitsoorumanngilara aningaaserivinni ileqqaakkat akileraarutitigut oqilisaassiffigineqartut pillugit inatsit naapertorlugu angajoqqaat meeqqaminnut Nanoq-kontomik pilersitsinissamut suli periarfissaqartuarmata.

Naggataatigut inatsisissamut siunnersuut tassungalu nassuiaatit innersuussutigissavakka.

Taamatut oqaaseqarlunga Naalackersuisut sinnerlugit siunnersuut Inatsisartunut suliaassanngortippara aammalu Inatsisartut Akileraartarnermut Akitsuusiisarnermullu Ataatsimiititaliaanni suliarineqareernerani aappassaaneerpeqarnissaanut ingerlatillugu.